



МАЬНАВИЙ ХАЁТ

ТАРИХИЙ-ФАЛСАФИЙ, МАЬНАВИЙ-МАЬРИФИЙ, ИЛМИЙ-ОММАБОП ЖУРНАЛ

№1/2018

Каромат
МУЛЛАХҮЖАЕВА



БАХТ АХТАРИН АХТАРИБ

Заҳириддин Муҳаммад Бобур ҳақида сўз кетганда ҳамиша шоҳ ва шоир, деган таърифга дуч келамиз. Уларнинг бирини иккинчисидан устун қўйиб бўлмаслигини яхши биламиз. Бу ифодага аллақачон ўрганиб бўлганимиз. Ҳамма гап қисматга битилган мана шу шоҳлик ва шоирликда эканини ҳам тушунамиз. Тақдир бундай бир-бирига мувофиқ келиши қийин бўлган икки аъмолнинг рафторидан чигаллашиб, нечоғли мураккаблик келиб чиққанини ҳам тасаввур қиласиз: шоҳлик сиёсати, шоирликнинг ҳазин изтироблари... Бу тасаввурлар Бобурнинг юрт әгаллаш учун кечган жанглари, баъзан қаттиққўллик билан олиб борган сиёсати мужассам воқелик ва қўнгил ўртасида кечадиган катта кураш майдонига ўхшайди, гўё.

*Даврон мени ўткарди сару сомондин,
Ойирди мени бир йўли хонумондин.
Гаҳ бошима тож, гоҳ балойи таъна,
Неларки, бошимға келмади даврондин.*



Шохлик азобларини бошидан кечирган, уларни шоир кўнглидан ўтказган Бобурнинг бундай ҳасби ҳол руబойлари, «Бобурнома» ўзгача фикрлашга имкон бермайди. Дунё китобхонлари севиб ўқийдиган инглиз, немис тилларидағи «Бобур – йўлбарс», «Фаргоналик шаҳзода», «Тож кийган дарвеш» каби асарларда ҳам, ўзбеклар орасида шухрат топган «Юлдузли тунлар» романида ҳам Бобур ҳақидаги бу тасаввурлар ўзгармайди. Чунки уларнинг ҳаммаси «Бобурнома»га таяниб ёзилган. «Бобурнома» эса улкан ва ноёб манба. Ундаги маълумотлар, ахборотлар, таъриф, тавсиф ва талқинлар ҳамма замонларда қимматли аҳамият касб этиб келмоқда. «Бобурнома»ни ўқиш – Бобурни таниш демак.

Бобурни яна-да яхшироқ билиш, унинг кўнглидаги қувончу ҳасратга ошно бўлиш истаги унинг шеърларини ўқишга ундейди. Шеърларни ўқиймиз. Кўнглимиз ҳам осмон қадар юксалгандек бўлади, нимадир жонимизни ўттайди, томирдаги қонимизнинг шовуллаб оқаётганини ҳис қила бошлаймиз... ва ўзини, тақдирини излаётган Бобурни таниймиз.

Не толеъдур, мангаким, ахтари баҳтим топилмайди,

Фалак авроқини ҳар нечаким дафтардек ахтардим, – деб ёзгиради у.

Ҳа, фалакни дафтардек қанча варақлаб кўрмасин, шоир у ердан ўз баҳтининг юлдузини тополмади. Тақдир битикларидан истаганингни тополмас экансан, яхшию ёмон ишларни кечирган бу бош учун ўзгаларнинг таънаю таърифлари бирдек эмасми? Бошидан шунча савдоларни ўтказган шоир ўзгалар гап-сўзининг «қадр»и нечоғли эканлигини жуда эрта англаб етган эди:

Улуснинг таъну таърифи манга, Бобур, баробардур,

Бу оламда ўзумни чун ямон-яхшидин ўткардим.

Биз буларнинг ҳаммасини шеърнинг сехри деб ҳам ўйлаймиз. Бизни юксакликка ундаётган қанотларимизни йиғиб олмокчи бўламиз. Чунки шеър тугаб, ҳаёт бошланаётгандек – Бобурни таниш, англаш истагида «Бобурнома»ни ўқишга тутинимиз. Бобурнинг жангу жадалга, яшаш учун курашга, ўзи истагандек катта бир давлатни барпо этиш йўлидаги буюк ишларига ҳамроҳ бўламиз. Гоҳ жанг билан, гоҳ сулҳ билан эгалланган ерлар, мамлакатлар, ...йўқотишлар ортидан келган топишлар. «Бобурнома»ни ўқир эканмиз, бирдан қанотларни йиғиш эмас, аксинча, уларга эрк бериш кераклигини англай бошлаймиз.

Фалакни дафтардек қанча варақлаб кўрмасин, шоир у ердан ўз баҳтининг юлдузини тополмади. Тақдир битикларидан истаганингни тополмас экансан, яхшию ёмон ишларни кечирган бу бош учун ўзгаларнинг таънаю таърифлари бирдек эмасми?



Бобурни Юлий Цезарга қиёслаган катта олимлар, сиёсатчилар, унинг дилбар инсон, гўзал қалб эгаси эканлигини алоҳида эътироф этиб, «Бобурнома»ни Цезарнинг «Комментарийлар»идан устун қўйишган.



Муаллифнинг ўзи «Вақоэй» – «Воқеанома» деб атаган бу асар Бобур кўнглиниң изхори. Унда шоҳ ва шоир Бобурнинг бутун истеъоди намоён.

Асарнинг муайян қисмida ўзининг улкан мақсади, орзуларини амалга ошириш истагида жанг жадаллар ичра сарсон-саргардон юрган Бобур қаттиқўл ва моҳир саркарда қиёфасида намоён бўлади. Оз сонли қўшини билан Султон Иброҳимнинг кўпсононли лашкарини ярим кунда ер билан яксон қилишга муваффақ бўлгани ҳақида «Бобурнома» муаллифи шундай ёзади: «...Тўлғамага тайнинланган аскарларга ўнг ва чап қўлдан душманнинг орқа томонига ўтиб, ўқ отиб уруш бошлашлари, ўнг ва чап қанотлардагилар ҳам душман билан олишишлари учун фармон бўлди. Тўлғамадагилар душман орқасига ўтиб, ўқ ота бошладилар. Чап қанотдаги Маҳдий Хожа жангни ҳаммадан олдин бошлаб юборди. Маҳдий Хожага қарши бир тўда аскар бир фил билан бостириб келди. Маҳдий Хожанинг одамлари жуда кўп ўқ отиб, уларни чекинишига мажбур қилди. Чап қанотга марказдан Аҳмадий парвоначи, Турдигек Кўчбек ва Муҳиб Али халифа ёрдамга юборилди. Ўнг қанотда ҳам жанг бошланиб кетди.

Муҳаммад Али кўкалдош, Шоҳ Мансур барлос, Юсуф Али ва Абдуллога марказ қўшини олдида туриб жанг бошлаш буюрилди. Устод Аликули ҳам марказ қўшини олдида туриб фарангиги (*Европадан келтирилган отиш қуроли*)дан отди. Мустафо тўпчи ҳам марказий қўшиннинг чап қанотидаги арава устидаги зарбзандан яхши зарбалар берди. Ўнг қанот, чап қанот, марказ ва тўлғамадагилар душманни ҳар тарафдан ўраб олиб, устига ўқ ёғдириб, жангни астойдил қизитдилар».

«Бобурнома» саҳифаларида олиб борилган урушларнинг бу каби тафсилотлари кўп учрайди. Лекин воқеаларнинг бундай тасвирланиши «Бобурнома»ни фақат жангнома сифатида баҳолашга имкон бермайди. Шу боис, Бобурни Юлий Цезарга қиёслаган катта олимлар, сиёсатчилар, унинг дилбар инсон, гўзал қалб эгаси эканлигини алоҳида эътироф этиб, «Бобурнома»ни Цезарнинг «Комментарийлар»идан устун қўйишган. Чунки Бобурнинг асари улкан қалб соҳибининг битикларидир.

Умри асосан сарсон-саргардонликда ўтган Бобур ўзини ҳамиша назорат қилишга ўрганган эди. Ҳар бир хатти-ҳаракати учун доим ўзига ҳисоб бериб борар, бирор ножӯя иш содир бўлса, унинг сабабини қидирар ва кўпинча, бу сабабни ўзидан топар

ва хатосини тўғрилашга ҳаракат қиласди. Албатта, ёшлик шавқи, рух эркинлиги, қалбнинг жўшқин истаклари уни ҳам кўнгилнинг кўчаларига кўп бор олиб кирган. Шуларни эслар экан, адид «Бобурнома»да шундай ёзади:

«Илгарилари яхшими, ёмонми, жиддийми ё ҳазилми, нима хаёлимга келса, мутойиба йўли билан баъзан шеър қилиб айтардим, – деб ёзади Бобур. – Жуда ёмон ва қўпол шеър бўлса ҳам ёзиб кўйиларди. «Мубайин»ни шеърга солаётган чоғим, ожиз хаёлимга ва маҳзун кўнглимга сўзларни бундай қайд этган тилга ва фикрни ёмон сўзларга сарфлаган кўнгилга ҳайф; бундай маънони пайдо қилган ва яна қўпол хаёлларни хотирга келтирган ундан кўнгилга афсуслар бўлсин, деган фикр келди.

Бир-икки кун ўтиб, Бигромга келиб тўхтаганимизда тумов бўлиб, иситмаладим. Бу шамоллашим йўталга олиб келди. Ҳар йўталганда қон тупурадим, кўп иситмаладим. Бу иситма қондан эди. Дард қаердан эканлигини тушундим...

*Не қилайн сенинг била, эй тил,
Жиҳатингдин менинг ичим қондур,
Неча яхши десанг бу ҳазл ила шеър –
Бириси фаҳшу бири ёлғондур,
Гар десанг куймайнин бу журм била,
Жилавингни бу арсадин ёндор.*

Тавба қилиб... яна бошдан гуноҳларимни кечиришини ёлвориб, узр сўраб, кўнгилни бундай бўлмагур хаёллардан, номуносиб ишлардан тиндириб, қаламни синдиридим...».

Сўзга бундай муносабат унинг имон-эътиқоди билан боғлиқ. Шоҳлиги каби сўзни Бобур қисмат деб билди. Шунинг учун руҳиятидаги маҳзунлик, танасидаги дард ҳам сўзга боғлиқлигини ҳеч кимга ўхшамаган даражада ҳис этарди. Асарнинг яна бир ўрнида тўғри – ҳақ сўзнинг танасидаги дарддан халос бўлиш учун ёрдам берганини бошқа бир воқеага боғлаб шундай эслайди:

«...жума куни танамнинг ҳарорати кўтарилиди. Жума намозини масжида қийналиб ўқидим. Кейинги куни пешин намозини эҳтиёткорлик билан китобхонада анча вақт ўтказиб ўқидим. Индини – якшанба куни иситмам чиқиб, озроқ титроқ тутди.

Сафар ойининг йигирма еттинчисида, сесланба кечаси ҳазрат Хожа Убайдуллоҳнинг «Волидия» рисоласини назмда битиш кўнглимдан ўтди. Ҳазратнинг руҳига илтижо қилиб, кўнглимдан ўтказдимки, агар бу манзума ҳазратга мақбул бўлса, «Қасидаи Бурда» мақбул тушиб, фалаж касалидан халос бўлгани каби мен ҳам бу хасталиқдан қутулгайман ва бу назмимнинг қабулига далил бўлгай. Шу ният билан рисолани назм этишни бошладим. Ўша кеча ўн уч байт айтилди. Мен ҳар куни ўн байтдан кам ёзмаслик мажбуриятини олдим, адашмасам, фақат бир кун ёзолмадим. Ўтган йили ва, умуман, ҳар сафар шу хасталик бошланса, у камида бир ой-қирқ кун давом этарди. Тангрини инояти билан, ҳазратнинг ҳимматидан ойининг йигирма тўққизинчисида, пайшанба куни бир оз руҳсизландим ва шу билан бу касалдан халос бўлдим. Раби ул-аввал ойининг саккизинчисида, шанба куни рисола сўзларини назмга солиб тугатдим. Бир куни эллик икки байт ёзилди».

«Бобурнома»даги бундай инончларнинг ифодаси, уларнинг таъбири, айниқса, Бобур тақдирида Хожа Аҳрор билан боғлиқ воқеалар талқини унинг хориқулоддаги истеъоди ҳакида ўйлашга мажбур қиласди. Хожа Аҳрор Бобурнинг тушла-

«Илгарилари яхшими, ёмонми, жиддийми ё ҳазилми, нима хаёлимга келса, мутойиба йўли билан баъзан шеър қилиб айтардим, – деб ёзади Бобур. – Жуда ёмон ва қўпол шеър бўлса ҳам ёзиб кўйиларди. «Мубайин»ни шеърга солаётган чоғим, ожиз хаёлимга ва маҳзун кўнглимга сўзларни бундай қайд этган тилга ва фикрни ёмон сўзларга сарфлаган кўнгилга ҳайф; бундай маънони пайдо қилган ва яна қўпол хаёлларни хотирга келтирган ундан кўнгилга афсуслар бўлсин, деган фикр келди...»

«Бобурнома»даги бундай инончларнинг ифодаси, уларнинг таъбири, айниқса, Бобур тақдирида Хожа Аҳрор билан боғлиқ воқеалар талқини унинг хориқулоддаги истеъоди ҳақида ўйлашга мажбур қилади. Хожа Аҳрор Бобурнинг тушларига кўп бор кирган. Хожа Аҳрорни ўзига фойибона пир деб билган Бобур у зотдан тушлари орқали ҳам мадад олган.

рига кўп бор кирган. Хожа Аҳрорни ўзига фойибона пир деб билган Бобур у зотдан тушлари орқали ҳам мадад олган. Бобур саргардонлик йиллари бошидан ўтган бир воқеани эслайди. Бу воқеа унинг душман қўлида ўлим билан юзма-юз келган ва ундан ўзга чора йўқлигини тан олиб турган пайти содир бўлганди:

«Ўрнимдан туриб, боғнинг бир гўшасига бордим. Ўзим билан ўзим мулоҳаза қилдим. Дёдимки: «Киши агар юз, борингки, минг йил яшаса ҳам охири ўлмок керак...

Ўлимни бўйнимга олдим. Ўша боғда бир сув оқиб келарди, таҳорат олдим. Икки ракъат намоз ўқидим. Бошимни муножотга қўйиб, тилак тилаётган эдимки, кўзим уйқуга кетибди. Туш кўраяпман: Хожа Яъкуб (Хожа Аҳрордан иршод ижозати олган нақшбандия тариқатининг пири муршиди Хожа Яъкуб Чархий. – К.М.) рўпарамга оқ-кора тусдаги отда, шундай от минган кўп отлиқлар билан келдилар. «Фам емангиз. Хожа Аҳрор мени сизга юбордилар», дедилар. «Биз уларга Оллоҳдан мадад сўраб, подшоҳлик таҳтига ўлтурғизганимиз. Ҳар ерда мушкул иш тушса, бизни назарига келтуруб ёд этсин, биз ўша ерда ҳозир бўлурмиз», деб тайинладилар. Ҳозир ушбу соатда фатҳ ва ғалаба сизнинг томондадир. Бош кўтаринг. Ўйғонинг».

Бобур бу сафар ҳам омон қолади. Ҳар гал танг аҳволга тушганида, ўлим билан юзма-юз келганида, мағлубият остонасида турганида унинг мадад топиши, кимлардир ишониши қийин бўлган муваффақиятлари замирида руҳониятининг бутунлиги ва имонининг саломатлиги турарди, аслида.

Айни пайтда, Бобур ҳаётсевар инсон эди. Қаерга бормасин, ўша ернинг табиитини меҳр билан тасвирлайди. Гўзал манзараларга ошиқ бўлиб қолади. Қишининг қорли бўронлари, баҳорнинг дилкаш рангинлиги, кузнинг ғамгин ҳазонлари «Бобурнома»даги энг таъсирили саҳифалардан. Улар шоирнинг шеърларига ҳам кўчган:

Ёз фасли, ёр васли, дўстларнинг суҳбати,

Шеър баҳси, ишқ дарди, боданинг кайфияти, – деб бошлайди шоир бир ғазалини.

Баъзан баҳор боис ёзган шеърларининг тарихини ҳам айтиб ўтгандек бўлади, масалан: «Баҳорда Борон чўли, Чоштуба дашти ва Гулбаҳор этаклари жуда файзли бўлади. Сабзаси Кобул вилоятининг ўзга ерларига қараганда хийла яхши бўлади: турли-туман лолалар очилади. Бир маротаба лола навларини санашларини буюрдим: ўттиз тўрт нав лола чиқди. Чунончи, бу ерлар таърифида бир байт айтилган эди:

Сабзаву гуллар била жаннат бўйлур Кобул баҳор,

Хосса бу мавсумда Борон ёзисиу Гулбаҳор».

Мана шу сайрга келганида ёзган бошқа бир ғазали ҳақида ҳам гапириб, шундай дейди: «Ушбу сайрга келганда, бу ғазални ёзиб тугатдим:

Менинг кўнглумки гулнинг фунчасидек таҳ-батаҳ қондур,

Агар юз минг баҳор ўлса очилмоғи не имкондур?».

Табиатни, унинг гўзал манзарасини завқ билан томоша қилишни Бобур жуда яхши кўрган, у ҳақда ёзишдан чарчамаган: «...Пайшанба куни офтоб чиққанда дарё қирғоғидан кўзғалдик. ...ажойиб гулзорни томоша қилдик. Сариқ ва қизил гуллар бўлак-бўлак жойда тўп-тўп бўлиб, яна баъзи ерларда фақат сариқ гуллар очилиб ётибди. Яна баъзи ерларда худди сочиб ташлагандек сариқ-қизил гуллар аралаш очилган. Қароргоҳ яқинидаги тепалик устида ўтириб, гулзорни томоша

қилдик. Худди режалаштириб экилгандек, бир тепаликнинг олти тарафида – бир жойида сариқ ва иккинчى жойида қызил гуллар қатор-қатор бўлиб олти бурчак шаклида очилиб ётибди. Икки четда гул камроқ очилган, бироқ кўзимиз илғаган ерларнинг ҳаммаёғи гулзор эди. Паршавор атрофларида ҳам баҳор чоғи яхши гуллар бунёд этилади».

Баҳор ҳаммани илҳомлантиради. Аммо «Бобурнома»даги ҳазон фасли тасвири китобхонни ўзига тортади. Айниқса, Бобурнинг кузнинг тимсолу ташбеҳларига йўғрилган шеърлари эмас, балки «Бобурнома»нинг бир неча ўрнида келган ҳазон сайри – Бобурнинг кузни, ҳазонларни томоша қилиш мақсадида сайрга чиқишининг ўзиёқ дилни ўртайди.

«...Душанба куни Исталифга ҳазон сайрига борилди... Аср намозига яқин Беҳзодийга етиб келдик, ҳазон жуда кўп тушганди... тўқилган ҳазонлар шу қадар гўзал эдики, сарғайган дараҳтлар остида ўтиридик...»

«Куз жуда яхши келганди. ...пешин намози вақтида Истарғачда бир яхши ҳазонбоғда тўхтаб, сұҳбат курдик... Эрталаб ош еб, отларга миниб, Истарғач пастидаги подшоҳий боғни сайр қилдик. Бир олма дараҳти яхши ҳазон бўлганди, ҳар бир шоҳида беш-олти барг қаторлашиб қолганди, агар рассомлар қанча ҳаракат қилиб чизсалар ҳам, бундай чизолмасдилар.

*Ҳазон яғроғи янглиғ гул юзинг ҳажрида сарғардим,
Кўриб раҳм айлагил, эй лоларух, бу чехраи зардим....».*

«Бобурнома»да тасвир этилган воқеалар ичида яшаётган катта кўнгил бор. Гоҳ бу воқеалар шиддатида ёнган, гоҳ ёлғизликнинг сокин гўшасини макон тутган, гоҳ ватан соғинчидан ўртанган, гоҳида ҳаётнинг бор шодлигу қувончларидан дунёни унумтоқчи бўлган кўнгил у. Воқеалар ичра – шоҳ, кўнгилда – шоир бўлиб яшаган улкан ҳодисадир Бобур. Бобурнинг кўнгли, кўпинча, ёлғизликка мойил бўлса-да, подшоҳлик билан ёлғизлик мувофиқ эмаслигини яхши билгани учун буни кўп эслайди ва ўзи билан курашади. Ўғли Ҳумоюнга битган мактубида ҳам унга бу борада ўғитлар беради: «...хатларингда ёлғизлик, ёлғизлик деб ёзибсан. Подшоҳлиқда бундай дейиш айбдир. Ахир айтадилар-ку:

*Агар пой банди ризо пеш гир,
Ва гар яксуори сари хеш гир.
(Агар оёғинг банд бўлса, ризони олдингга қўй,
Агар танда сувора бўлсанг, ўз бошингга бор.*

Яъни: жангга боғланган бўлсанг, бошингга келган ҳар нарсага рози бўл, агар ҳеч нарсага боғланмаган бўлсанг, йўлингдан қолма, кетавер.)



«Бобурнома»да тасвир этилган воқеалар ичида яшаётган катта кўнгил бор. Гоҳ бу воқеалар шиддатида ёнган, гоҳ ёлғизликнинг сокин гўшасини макон тутган, гоҳ ватан соғинчидан ўртанган, гоҳида ҳаётнинг бор шодлигу қувончларидан дунёни унумтоқчи бўлган кўнгил у.



Бобурнинг таъкидлашича,
«Ақл эгаси бўлган ҳар
қандай одам, ортидан ёмон
сўз билан эсланадиган
ишларга нега қўл уаркан,
эс-хуши жойида бўлган
ҳар бир киши дунёдан
ўтгач таҳсинлар билан
эсланадиган ишларни
қилишга нега уринмас
экан. Испнинг ёдга
олинишини ҳакимлар
иккинчи умр деганлар».

Ҳеч бир банд подшоҳлик бандича бўлмас. Подшоҳлик билан ёлғизлик мувофиқ келмас».

Бобурнинг ўзи ҳам ёлғизлик ҳақидаги ўйларини, изтиробларини кўнглига яширди, шеърларига кўчирди, ҳаётда эса катта шавқ ва шижоат билан яшади, қаерга бормасин, бунёдкор бўлишга интилди. Бобурнинг таъкидлашича, «Ақл эгаси бўлган ҳар қандай одам, ортидан ёмон сўз билан эсланадиган ишларга нега қўл уаркан, эс-хуши жойида бўлган ҳар бир киши дунёдан ўтгач таҳсинлар билан эсланадиган ишларни қилишга нега уринмас экан. Испнинг ёдга олининиши ҳакимлар иккинчи умр деганлар».

Бори элга яхшилиғ қилғилки, мундин яхши йўқ –

Ким, дегайлар даҳр аро қолди фалондин яхшилиғ! – дейди шоир бир ғазалида.

Бундай фикрлар, айниқса, унинг Ҳиндистонни эгаллагандан кейинги фаолиятида яна ҳам ёрқинроқ кўринади.

Нималарни бошидан кечирмадилар Бобур ва унинг ҳамроҳлари Ҳиндистонга кетиб. Иссиқ ҳаво, чанг ва шамол Мовароуннаҳр ва Хуросоннинг сафоли ерларидан кетган бекларни, мулозимларни, аскар ва ходимларни қаттиқ қийнади. Кимлардир кетиши тараффудига ҳам тушди. Одамлардаги бундай бекарорликни кўриб, барча бекларни чақириб, кенгаш ўтказган Бобур: «Неча йиллар ҳаракат қилиб, машақат чекиб, узоқ ерларни босиб ўтиб, лашкар тортиб, ўзимизни ва лашкарни жанг ва ўлим хатарига солдик. Тангрининг марҳамати билан шунча кўп душманни енгиб, бундай катта мамлакатни эгалладик. Энди эса, қандай куч ва зарурият мунчалар жон тортиб олган ерларимизни ҳеч бир сабабсиз ташлаб кетишга мажбур қилмоқда. Ким бизга хайриҳоҳ бўлса, бундан кейин бу каби сўзларни айтмасин, кимки тоқат қилолмай кетишни ният қилган бўлса, кетсин, кетгач, қайтиб келмасин», – деган таъсирили гапни айтади. Бу сиёsat кўпчиликни хушёр тортирган эди.

Ҳиндистоннинг битта камчилиги – унда оқар сувнинг йўқлиги эди. Қаердаки ўрнашмоқчи бўлсалар, чархлар ясад, оқар сув ўтказиб, режа билан боғлар барпо қилишни ўйларди подшоҳ Бобур. Арага келганларидан бир неча кун ўтиб, шу ишни амалга ошириш ниятида Жуун дарёсидан ўтиб, боғ куриш учун ерларни кўриб чиқади. Бу ерлар шу қадар кўримсиз ва хароб эдики, уни кўнгли тортмай ва қониқмай, яна сувдан кечиб қайтиб кетади. Чорбоғ ҳақидаги фикрлар ҳам хаёлидан кўтарилади, аммо Арага яқин бошқа бир бўш ер ҳам йўқ эдики, бир неча кундан сўнг иложисиз шу ернинг ўзида иш бошлайдилар. «Аввал катта қудук қазилди, – деб ёзади Бобур, – ҳозир ҳаммом суви ўша ердан олинади. Яна анбилий дараҳтлари ўсиб ётган ва саккиз бурчакли ҳовуз қурилган бир бўлак ерда ишладик. Ундан сўнг катта ҳовуз ва ҳовли барпо бўлди. Кейин тош иморат олдиаги ҳовуз ва толор қурилди. Ундан сўнг «Хилватхона» боғчаси ва ўйлар бино бўлди. Ундан сўнг ҳаммом қурилди. Бундай кўримликни хушёр тортирган эди.



сиз ва бетартиб Ҳиндда яхши тартибли бинолар ва текис боғлар барпо этилди. Ҳар гўшада, ҳар бурчакда ёқимли гулзорлар, ҳар бир гулзорда тартиб билан экилган яхши гул ва настаринлар этилди».

Ҳинди斯顿ни обод қилди, у ерда ўзи истагандек яшашга ҳаракат қилди. Лекин унинг кўнгли ўзи севган гўзал Кобулга талпинарди, бобо юрти Самарқанд бир зум ҳам ёдидан чиқмасди. Шу боис Ҳумоюнга ёзган мактубида кўнгли тубида сақлаб юрганларини очади: «Агар Тангрининг марҳамати билан Балх ва Ҳисор вилоятларини қўлга киритиш насиб этса, Ҳисорга сен ўз одамингни кўй, Балхда Комроннинг одами турсин. Агар Тангрининг инояти билан Самарқанд ҳам фатҳ этилса, Самарқандда ўзинг ўтири... Жуда кўп фатҳ ва зафарларни Кобулда эканимда кўрдим. Шу боис Кобулни яхши ниятларимга эришган жой деб билдим ва уни ўз ихтиёrimda қолдирдим. Ҳеч бирингиз унга тама қилмагайсиз»...

Бобур вафотидан бир оз вақт ўтгач – 1533 йили унинг хокини чевараси Шоҳжаҳон Кобулга кўчириб, мақbara барпо этади.

Бобур шеърлари, «Бобурнома» кишини уйғоқликка ундаиди, унга қанот беради, руҳлантиради, қалбининг тубига назар ташлашга, яхши-ёмонни фарқлашга ўргатади. Ҳудо берган умрни беҳуда сарфламасликка, умрни қадрлашга, демак, ўзгаларни ҳам севишга, қадрлашга ўргатади.

Эҳтимол, Бобурнинг ўзи фалакни неча бор вараклагани билан тополмаган баҳт юлдузи унинг асарларига тақдим этилгандир.

Бобур шеърлари,
«Бобурнома» кишини
уйғоқликка ундаиди,
унга қанот беради,
руҳлантиради, қалбининг
тубига назар ташлашга,
яхши-ёмонни фарқлашга
ўргатади. Ҳудо берган умрни
беҳуда сарфламасликка,
умрни қадрлашга, демак,
ўзгаларни ҳам севишга,
қадрлашга ўргатади.